

佛說彌勒成佛經

姚秦三藏法師鳩摩羅什譯



清刻龍藏佛說法變相圖

佛說彌勒成佛經

貞七

姚秦三藏法師鳩摩羅什譯

如是我聞一時佛住摩伽陀國遊波沙山過
去諸佛常降魔處夏安居中與舍利弗經行
山頂而說偈言

貞七

一心善諦聽 光明大三昧 無比功德人
正爾當出世 彼人說妙法 皆悉得充足
如渴飲甘露 疾至解脫道

時四部眾平治道路掃灑燒香皆悉來集持
諸供具供養如來及比丘僧諦觀如來喻如
孝子視於慈父如渴思飲愛念法父亦復如
是各各同心欲請法王轉正法輪諸根不動
心心相次流住向佛是時比丘比丘尼優婆
塞優婆夷天龍鬼神乾闥婆阿脩羅迦樓羅
緊那羅摩睺羅伽人非人等各從座起右繞

世尊五體投地向佛泣淚爾時大智舍利弗
齊整衣服偏袒右肩知法王心善能隨順學
佛法王轉正法輪是佛輔臣持法大將憐愍
衆生故欲令脫苦縛白佛言世尊如來向者
於山頂上說偈讚歎第一智人前後經中之
所未說此諸大衆心皆渴仰淚如盛雨欲聞
如來說未來佛開甘露道彌勒名字功德神
力國土莊嚴以何善根何戒何施何定何慧
何等智力得見彌勒於何心中修入正路舍
利弗發此問時百千天子無數梵王合掌恭
敬異口同音皆發是問白佛言世尊願使我
等於未來世得見人中最大果報三界眼目
光明彌勒普爲衆生說大慈悲并八部衆亦
皆如此恭敬叉手勸請如來爾時梵王與諸
梵衆異口同音合掌讚歎而說頌曰

南無滿月具足十力大精進將勇猛無畏
一切智人超出三有成三達智降伏四魔
身爲法器心如虛空靜然不動於有非有
於無非無達解空法世所讚歎我等同心
一時歸依願轉法輪

爾時

爾時世尊告舍利弗當爲汝等廣分別說諦
聽諦聽善思念之汝等今者以妙善心欲問
如來無上道業摩訶般若如來明見如觀掌
中菴摩勒果告舍利弗若於過去七佛所得
聞佛名禮拜供養以是因緣淨除業障復聞
彌勒大慈根本得清淨心汝等今當一心合
掌歸依未來大慈悲者我當爲汝廣分別說
彌勒佛國從於淨命無諸諂僞檀波羅蜜尸
波羅蜜般若波羅蜜得不受不著以微妙十
願大莊嚴得一切衆生起柔軟心得見彌勒

大慈所攝生彼國土調伏諸根隨順佛化舍利弗四大海水面各減少三千由旬時閻浮提地縱廣正等十千由旬其地平淨如瑠璃鏡大適意華悅可意華極大音華優曇鉢華大金果華七寶果華白銀果華華鬚柔輭狀

如天繒生吉祥果香味具足輭如天繒叢林樹華甘果美好極大茂盛過於帝釋歡喜之園其樹高顯高三十里城邑次比雞飛相及皆由今佛種大善根行慈心報俱生彼國智慧威德五欲衆具快樂安隱亦無寒熱風火等疾無九惱苦壽命具足八萬四千歲無有中天人身悉長一十六丈日日常受極妙安樂遊深禪定以爲樂器唯有三病一者飲食二者便利三者衰老女人年五百歲爾乃行嫁有一大城名翅頭末縱廣一千二百由旬

高七由旬七寶莊嚴自然化生七寶樓閣端嚴殊妙莊校清淨於窻牖間列諸寶女手中皆執真珠羅網雜寶莊校以覆其上密懸寶鈴聲如天樂七寶行樹樹間渠泉皆七寶成流異色水更相映發交橫徐遊不相妨礙其岸兩邊純布金沙街巷道陌廣十二里皆悉清淨猶如天園衆寶莊嚴有大龍王名多羅尸棄福德威力皆悉具足其池近城龍王宮殿如七寶樓顯現于外常於夜半化作人像以吉祥瓶盛香色水灑淹塵土其地潤澤譬若油塗行人往來無有塵土是時世人福德所致巷陌處處有明珠柱高十二里光踰於日四方各照八十由旬純黃金色其光照曜晝夜無異燈燭之明猶若聚墨香風時來吹明珠柱兩寶瓔珞衆人皆用服者自然如三

禪樂處處皆有金銀珍寶摩尼珠聚積用成
山寶山放光普照城內人民遇者皆悉歡喜
發菩提心有大夜叉神名跋陀婆羅賒塞迦
晝夜擁護翅頭末城及諸人民灑掃清淨設
有便利地裂受之受已還合生赤蓮華以蔽
穢氣時世人民若年衰老自然行詣山林樹
下安樂憺怕念佛取盡命終多生大梵天上
及諸佛前其土安隱無有怨賊劫竊之患城
邑聚落無閉門者亦無衰惱水火刀兵及諸
饑饉毒害之難人常慈心恭敬和順調伏諸
根如子愛父如母愛子語言謙遜皆由彌勒
慈心訓導持不殺戒不噉肉故以此因緣生
彼國者諸根淡靜面貌端正威相具足如天
童子復有八萬四千衆寶小城以爲眷屬翅
頭末城最處其中男女大小雖遠若近佛神

力故兩得相見無所障礙夜光摩尼如意珠
華遍滿世界雨七寶華鉢頭摩華優鉢羅華
拘物頭華分陀利華曼陀羅華摩訶曼陀羅
華曼殊沙華摩訶曼殊沙華彌布其地或復
風吹迴旋空中時彼國界城邑聚落園林浴
池泉河流注自然而有八功德水命命之鳥
鵝鴨鴛鴦孔雀鸚鵡翡翠舍利美音鳩鵲羅
耆婆闍婆快見鳥等出妙音聲復有異類妙
音之鳥不可稱數遊集林池金色無垢淨光
明華無憂淨慧日光明華鮮白七日香華瞻
蔔六色香華百千萬種水陸生華青色青光
黃色黃光赤色赤光白色白光香淨無比晝
夜常生終無萎時有如意果樹香美無比充
滿國界香樹金光生寶山間充滿國界出適
意香普熏一切爾時閻浮提中常有好香譬

如香山流水美好味甘除患雨澤隨時天園貞七
成熟香美稻種天神力故一種七穫用功甚
少所收甚多穀稼滋茂無有草穢衆生福德
本事果報入口消化百味具足香美無比氣
力充實其國爾時有轉輪聖王名曰儂佉有
四種兵不以威武治四天下具三十二大人
相好王有千子勇猛端正怨敵自伏王有七
寶一金輪寶千輻轂輞皆悉具足二白象寶
白如雪山七支柱地嚴顯可觀猶如山王三
紺馬寶朱鬣毛尾足下生華七寶蹄甲四神
珠寶明顯可觀長於三肘光明雨寶適衆生
願五玉女寶顏色美妙柔輒無骨六主藏臣
口中吐寶足下雨寶兩手出寶七主兵臣直
動身時四兵如雲從空而出千子七寶國界
人民一切相視不懷惡意如母愛子時王千

子各取珍寶於正殿前作七寶臺有三千重
高十三由旬千頭千輪遊行自在有四大寶
藏一一大藏各有四億小藏圍繞伊鉢多大
藏在乾陀羅國般軸迦大藏在彌提羅國賓
伽羅大藏在須羅吒國儂佉大藏在波羅柰
國古仙山處此四大藏自然開發顯大光明
縱廣正等一千由旬滿中珍寶各有四億小
藏附之有四大龍各自守護此四大藏及諸
小藏自然湧出形如蓮華無央數人皆共往
觀是時衆寶無守護者衆人見之心不貪著
棄之於地猶如瓦石草木土塊時人見者心
生厭離各各相謂而作是言如佛所說往昔
衆生爲此寶故共相殘害更相偷劫欺誑妄
語令生死罪展轉增長墮大地獄翅頭末城
衆寶羅網彌覆其上寶鈴莊嚴微風吹動其

音和雅如扣鐘磬演說歸依佛歸依法歸依
僧時城中有大婆羅門主名修梵摩婆羅門
女名梵摩跋提心性柔弱彌勒託生以爲父
母雖處胞胎如遊天宮放大光明塵垢不障
身紫金色具三十二大丈夫相坐寶蓮華衆
生視之無有狀足光明晃曜不可勝計諸天
世人所未曾親身力無量一一節力普勝一
切大力龍象不可思議毛孔光明照耀無量
無有障礙日月星宿水火珠光皆悉不現猶
如埃塵身長釋迦牟尼佛八十肘三丈十寸臂廣
二十五肘丈面長十二肘半丈五寸鼻高脩直當
于面門身相具足端正無比成就相好一一
相八萬四千好以自莊嚴如鑄金像一一好
中流出光明照千由旬肉眼清徹青白分明
常光繞身面百由旬日月星辰真珠摩尼七

寶行樹皆悉明耀現於佛光其餘衆光不復
爲用佛身高顯如黃金山見者自然脫三惡
趣爾時彌勒諦觀世間五欲過患衆生受苦
沉沒長流在大生死甚可憐愍自以如是正
念觀察苦空無常不樂在家獸家迫迫猶如
牢獄時懷怯王共諸大臣國土人民持七寶
臺有千寶帳及千寶軒千億寶鈴千億寶幡
寶器千口寶甕千口奉上彌勒彌勒受已施
諸婆羅門婆羅門受已即便毀壞各共分之
諸婆羅門觀見彌勒能作大施生奇特心彌
勒菩薩見此寶臺須臾無常知有爲法皆悉
磨滅修無常想讚過去佛清涼甘露無常之
偈
諸行無常是生滅法生滅滅已寂滅爲樂
說此偈已出家學道坐於金剛莊嚴道場龍

華菩提樹下枝如寶龍吐百寶華一一華葉
作七寶色色色異果適衆生意天上人間爲
無有比樹高五十由旬枝葉四布放大光明
爾時彌勒與八萬四千婆羅門俱詣道場彌
勒即自剃髮出家學道早起出家即於是日
初夜降四種魔成阿耨多羅三藐三菩提即
說偈言

久念衆生苦	欲拔無由脫	今者證菩提
豁然無所有	亦達衆生空	本性相如實
永更無憂苦	慈悲亦無緣	本爲救汝等
國城及頭目	妻子與手足	施人無有數
今始得解脫	無上大寂滅	當爲汝等說
廣開甘露道	如是大果報	皆從施戒慧
六種大忍生	亦從大慈悲	無染功德得
說此偈已默然而住	時諸天龍鬼神王不現	

其身而雨天華供養於佛三千大千世界六
變震動佛身出光照無量國應可度者皆得
見佛爾時釋提桓因護世天王大梵天王無
數天子於華林圍頭面禮足合掌勸請轉於
法輪時彌勒佛默然受請告梵王言我於長
夜受大苦惱修行六度始於今日法海滿足
建法幢擊法鼓吹法螺雨法雨正爾當爲汝
等說法諸佛所轉八聖道輪諸天世人無能
轉者其義平等直至無上無爲寂滅爲諸衆
生斷長夜苦此法甚深難得難入難信難解
一切世間無能知者無能見者洗除心垢得
萬梵行說是語時復有他方無數百千萬億
天子天女大梵天王乘天宮殿持天華香奉
獻如來繞百千帀五體投地合掌勸請諸天
妓樂不鼓自鳴時諸梵王異口同音而說偈

言

無量無數歲 空過無有佛 衆生墮惡道
世間眼目滅 三惡道增廣 諸天路永絕
今日佛興世 三惡道殄滅 增長天人衆
願開甘露門 令衆心無著 疾疾得涅槃

我等諸梵王 聞佛出世間 今者得值遇
無上大法王 梵天宮殿盛 身光亦明顯
普爲十方衆 勸請大導師 唯願開甘露
轉無上法輪

說此偈已頭面作禮復更合掌殷勤三請唯

九七

九

願世尊轉於甚深微妙法輪爲拔衆生苦惱
根本遠離三毒破四惡道不善之業爾時世
尊爲諸梵王即便微笑出五色光默然許之
時諸天子無數大衆聞佛許可歡喜無量遍
體踊躍譬如孝子新喪慈父忽然還活大衆

歡喜亦復如是時諸大衆右繞世尊經無數
匝敬愛無厭却住一面爾時大衆皆作是念
設復千萬億歲受五欲樂不能得免三惡道
苦妻子財產所不能救世間無常命難久保
我等今者於佛法中淨修梵行作是念已復
更念言設受五欲經無數劫如無想天壽無
量億歲與諸姝女共相娛樂受細滑觸會歸
磨滅墮三惡道受無量苦所樂無幾猶如幻
化蓋不足言入地獄時大火炯然百億萬劫
受無量苦求脫叵得如此長夜苦厄難拔今
日遇佛宜勤精進時儼佉王高聲唱言
設復生天樂 會亦歸磨滅 不久墮地獄
猶如猛火聚 我等宜時速 出家學佛道
說是語已時儼佉王與八萬四千大臣恭敬
圍繞及四天王送轉輪王至華林園龍華樹

下詣彌勒佛求索出家爲佛作禮未舉頭頃
鬚髮自落袈裟著體便成沙門時彌勒佛共
讓佉王與八萬四千大臣比丘僧等恭敬圍
繞并與無數天龍八部入翅頭末城足躡門
闍娑婆世界六種震動閻浮提地化爲金色
翅頭末大城中央其地金剛有過去諸佛所
坐金剛寶座自然湧出衆寶行樹天於空中
兩大寶華龍王作衆妓樂口中吐華毛孔雨
華用供養佛佛於此座轉正法輪謂是苦苦
聖諦謂是集集聖諦謂是滅滅聖諦謂是道
道聖諦并爲演說三十七品助菩提法亦爲
宣說十二因緣無明緣行行緣識識緣名色
名色緣六入六入緣觸觸緣受緣愛愛緣
取取緣有有緣生生緣老死憂悲苦惱等爾
時大地六種震動如此梵聲聞于三千大千

世界復過是數無量無邊下至阿鼻地獄上
至阿迦膩吒天時四天王各各將領無數鬼
神高聲唱言佛日出世降靈甘露世間眼目
今者始開普令天地一切八部於佛有緣皆
得聞知三十三天夜摩天兜率陀天化樂天
他化自在天乃至大梵天各各於已所統領
處高聲唱言佛日出世降靈甘露世間眼目
今者始開有緣之者皆悉聞知時諸龍王八
部山神樹神藥草神水神風神火神地神城
池神屋宅神等踊躍歡喜高聲唱言復有八
萬四千諸婆羅門聰明大智於佛法中亦隨
大王出家學道復有長者名須達那今須達
長者是亦與八萬四千人俱共出家復有利
師達多富蘭那兄弟亦與八萬四千人俱共
出家復有二大臣一名梵檀朱利二名須曼

那王所愛重亦與八萬四千人俱於佛法中
出家學道轉輪王寶女名舍彌婆帝今之毗
舍佉母是也與八萬四千姝女俱共出家儻
佉王太子名天金色今提婆婆那長者子是
亦與八萬四千人俱共出家彌勒佛親族婆
羅門子名須摩提利根智慧今鬱多羅善賢
比丘尼子是亦與八萬四千人俱於佛法中
俱共出家儻佉王千子唯留一人用嗣王位
餘九百九十九人亦與八萬四千人於佛法
中俱共出家如是等無量億衆見世苦惱五
陰熾然皆於彌勒佛法中俱共出家爾時彌
勒佛以大慈心語諸大衆言汝等今者不以
生天樂故亦復不爲今世樂故來至我所但
爲涅槃常樂因緣是諸人等皆於佛法中種
諸善根釋迦牟尼佛出五濁世種種訶責爲

汝說法無奈汝何教植來緣令得見我我今
攝受是諸人等或以讀誦分別決定脩多羅
毗尼阿毗曇爲他演說讚歎義味不生嫉妬
教於他人令得受持修諸功德來生我所或
以衣食施人持戒智慧修此功德來生我所
或以妓樂幡蓋華香燈明供養於佛修此功
德來生我所或以施僧常食起立僧坊四事
供養持八戒齋修習慈心行此功德來生我
所或爲苦惱衆生深生慈悲以身代苦令其
得樂修此功德來生我所或以持戒忍辱修
清淨慈心以此功德來生我所或造僧祇四
方無礙齋講設會供養飯食修此功德來生
我所或以持戒多聞修行禪定無漏智慧以
此功德來生我所或有起塔供養舍利念佛
法身以此功德來生我所或有窮困貧窮孤

獨繫屬於他王法所加臨當刑戮作八難業

頁七

十二

受大苦惱救濟彼等令得解脫修此功德來
生我所或有恩愛別離朋黨諍訟極大苦惱
以方便力令得和合修此功德來生我所說
是語已稱讚釋迦牟尼佛善哉善哉能於五
濁惡世教化如是等百千萬億諸惡衆生令
修善本來生我所時彌勒佛如是三稱讚釋
迦牟尼佛而說偈言

忍辱勇猛大導師 能於五濁不善世

教化成熟惡衆生 令彼修行得見佛

荷負衆生受大苦 令入常樂無爲處

教彼弟子來我所 我今爲汝說四諦

亦說三十七菩提 莊嚴涅槃十二緣

汝等宜當觀無爲 入於空寂本無處

說此偈已復更讚歎彼時衆生於苦惡世能

爲難事貪欲瞋恚愚癡迷惑短命人中能修
持戒作諸功德甚爲希有爾時衆生不識父
母沙門婆羅門不知道法互相惱害近刀兵
劫深著五欲嫉妬諂曲佞濁邪僞無憐愍心
更相殺害食肉飲血不敬師長不識善友不
知恩報恩生五濁世不知慚愧晝夜六時相
續作惡不知厭足純造不善五逆惡聚魚鱗
相咀求不知厭九親諸族不能相濟善哉善
哉釋迦牟尼佛以大方便深厚慈悲能於苦
惱衆生之中和顏美色善巧智慧說誠實語
示我當來度脫汝等如是導師明利智慧世
間希有甚爲難遇深心憐愍惡事衆生爲拔
苦惱令得安樂入第一義甚深法性釋迦牟
尼佛三阿僧祇劫爲汝等故修行難行苦行
以頭布施割截耳鼻手足支體受諸苦惱爲

八正道平等解脫利汝等故時彌勒佛如是
開導安慰無量諸衆生等令其歡喜彼時衆
生身純是法心純是法口常說法福德智慧
之人充滿其中天人恭敬信受渴仰時大導
師各欲令彼聞於往昔苦惱之事復作是念
五欲不淨衆苦之本又能除捨憂感愁恨知
苦樂法皆是無常爲說色受想行識苦空無
常無我說是語時九十六億人不受諸法漏
盡意解得阿羅漢三明六通具八解脫三十
六萬天子二十萬天女發阿耨多羅三藐三
菩提心天龍八部中有得須陀洹者種辟支
佛道因緣者發無上道心者數甚衆多不可
稱計時彌勒佛與九十六億大比丘衆并僊
佉王八萬四千大臣比丘眷屬圍繞如月天
子諸星隨從步出翅頭末城還華林園重閣

講堂時閻浮提城邑聚落小王長者及諸四
姓皆悉來集龍華樹下華林園中爾時世尊
重說四諦十二因緣九十四億人得阿羅漢
他方諸天及八部衆六十四億恒河沙人發
阿耨多羅三藐三菩提心住不退轉第三大
會九十二億人得阿羅漢三十四億天龍八
部發三菩提心時彌勒佛說四聖諦深妙法
輪度天人已將諸聲聞弟子天龍八部一切
大衆入城乞食無量淨居天衆恭敬從佛入
翅頭末城當入城時佛現十八種神足身下
出水如摩尼珠化成光臺照十方界身上出
火如須彌山流出金光現火滿空化成瑠璃
大復現小如芥子許泯然不現於十方踊於
十方沒令一切人皆如佛身種種神力無量
變現今有緣者皆得解脫釋提桓因三十二

輔臣與欲界諸天梵天王與色界諸天并餘
天子天女脫天瓔珞及以天衣而散佛上時
諸天衣化成華蓋諸天妓樂不鼓自鳴歌詠
佛德密雨天華梅檀雜香供養於佛街巷道
陌暨諸幡蓋燒衆名香其烟若雲世尊入城

時大梵天王釋提桓因合掌恭敬以偈讚佛

正遍知者兩足尊 天人世間無與等

十力世尊甚希有 無上最勝良福田

其供養者生天上 未來解脫住涅槃

稽首無比大精進 稽首慈悲大導師

東方天王提頭賴吒南方天王毗留勒叉西

南七

十五

方天王毗婁博叉北方天王毗沙門王與其
眷屬恭敬合掌以清淨心讚歎世尊

三界無有比 大悲自莊嚴 體解第一義

不見衆生性 及與諸法相 同入空寂性

善住無所有 雖行大精進 無爲無足跡

我今稽首禮 慈心大導師 衆生不見佛

長夜受生死 墜墮三惡道 及作女人身

今日佛興世 拔苦施安樂 三惡道已少

女人無諂曲 皆當得止息 具足大涅槃

大悲濟苦者 施樂故出世 本爲菩薩時

常施一切樂 不殺不惱他 忍心如大地

我今稽首禮 忍辱大導師 我今稽首禮

慈悲大丈夫 自免生死苦 能拔衆生厄

如火生蓮華 世間無有比

爾時魔王於初夜後夜覺諸天人民作如是

言汝等既得人身俱遇好時不應竟夜睡眠

覆心汝等若坐若立當勤精進正念諦觀五

陰無常苦空無我汝等勿爲放逸不行佛教

若起惡業後必致悔時街巷男女皆効此語

言汝等勿爲放逸不行佛教若起惡業後必有悔當勤方便精進求道莫失法利而徒生徒死如是大師拔苦惱者甚爲難遇堅固精進當得常樂涅槃爾時世尊次第乞食將諸比丘還至本處入深禪定七日七夜寂然不動彌勒弟子色如天色普皆端正獸生老病死多聞廣學守護法藏行於禪定得離諸欲如鳥出殼爾時釋提桓因與欲界諸天子歡喜踊躍復說偈言

世間所歸大導師 慧眼明淨見十方

貞七

十六

智力功德勝諸天 名義具足福衆生
願爲我等群萌類 將諸弟子詣彼山
供養無惱釋迦師 頭陀第一大弟子
我等應得見過佛 所著袈裟聞遺法
懺悔前身濁惡劫 不善惡業得清淨

爾時彌勒佛與娑婆世界前身剛強衆生及諸大弟子俱往耆闍崛山到山下已安詳徐步登狼跡山到山頂已舉足大指躡於山根是時大地十八相動既至山頂彌勒以手兩向擘山如轉輪王開大城門爾時梵王持天香油灌摩訶迦葉頂油灌身已擊大捷椎吹大法螺摩訶迦葉即從滅盡定覺齊整衣服偏袒右肩右膝著地長跪合掌持釋迦牟尼佛僧伽梨授與彌勒而作是言大師釋迦牟尼多陀阿伽度阿羅訶三藐三佛陀臨涅槃時以此法衣付囑於我今奉世尊時諸大衆各白佛言云何今日此山頂上有人頭蟲短小醜陋著沙門服而能禮拜恭敬世尊時彌勒佛訶諸大衆莫輕此人而說偈言

孔雀有好色 鷹鵠鷄所食 白象無量力

師子子雖小

自十七

撮食如塵土

十七

大龍身無量

金翅鳥所搏

人身雖長大

肥白端正好

七寶瓶盛糞

汙穢不可堪

此人雖短小

智慧如鍊金

煩惱習久盡

生死苦無餘

護法故住此

常行頭陀事

天人中最勝

苦行無與等

牟尼兩足尊

遺來至我所

汝等當一心

合掌恭敬禮

說是偈已告諸比丘釋迦牟尼世尊於五濁

惡世教化衆生千二百五十弟子中頭陀第

一身體金色捨金色婦出家學道晝夜精進

如救頭然慈愍貧苦下賤衆生恒福度之爲

法住世摩訶迦葉者此人也是也說此語已一

切大衆悉爲作禮爾時彌勒持釋迦牟尼佛

僧伽梨覆右手不遍繞掩兩指復覆左手亦

掩兩指諸人怪歎先佛卑小皆由衆生貪濁

憍慢之所致耳告摩訶迦葉言汝可現神足

并說先佛所有經法爾時摩訶迦葉踊身虛

空作十八變或現大身滿虛空中大復現小

如葶藶子小復現大身上出水身下出火履

地如水履水如地坐卧空中身不陷墜東湧

西沒西湧東沒南湧北沒北湧南沒邊湧中

沒中湧邊沒上湧下沒下湧上沒於虛空中

化作瑠璃窟承佛神力以梵音聲說釋迦牟

尼佛十二部經大衆聞已怪未曾有八十億

人遠塵離垢於諸法中不受諸法得阿羅漢

無數天人發菩提心繞佛三匝還從空下爲

佛作禮說有爲法皆悉無常辭佛而退還耆

闍崛山本所住處身上出火入般涅槃收身

舍利山頂起塔彌勒佛歎言大迦葉比丘是

釋迦牟尼佛於大衆中常所讚歎頭陀第一

通達禪定解脫三昧是人雖有大神通力而無高心能令衆生得大歡喜常愍下賤貧苦衆生彌勒佛歎大迦葉骨身言善哉大神德釋師子大弟子大迦葉於彼惡世能修其心爾時摩訶迦葉骨身即說偈言

頭陀是寶藏 持戒爲甘露 能行頭陀者必至不死地 持戒得生天 及與涅槃樂說此偈已如瑠璃水還入塔中爾時說法之處廣八十由旬長百由旬其中人衆若坐若立若近若遠各自見佛在於其前獨爲說法彌勒佛住世六萬億歲憐愍衆生故令得法眼滅度之後諸天世人闍維佛身時轉輪王收取舍利於四天下各起八萬四千塔正法住世六萬歲像法亦六萬歲汝等宜應各勤精進發清淨心起諸善業得見世間燈明彌

勒佛身必無疑也佛說是語已尊者舍利弗尊者阿難即從座起爲佛作禮胡跪合掌白佛言世尊當何名斯經云何奉持佛告阿難汝好憶持普爲天人分別演說莫作最後斷法之人此法之要名一切衆生斷五逆罪淨除業障報障煩惱障修習慈心與彌勒共行如是受持亦名一切衆生得聞彌勒佛名必免五濁世不墮惡道經如是受持亦名破惡口業心如蓮華定見彌勒佛經如是受持亦名慈心不殺不食肉經如是受持亦名釋迦牟尼佛以衣爲信經如是受持亦名若有聞佛名者決定得免八難經如是受持亦名彌勒成佛經如是受持佛告舍利弗我滅度後比丘比丘尼優婆塞優婆夷天龍八部鬼神等得聞此經受持讀誦禮拜供養恭敬法師

